

求恕齋
叢書

雪橋詩話三集

六



卷之三

七

雪橋詩話三集卷第六

遼陽楊鍾義撰集

吳興劉承幹參校

白健齋中丞準泰先世高麗人賜姓他喇氏隸內府正
黃旗由筆帖式主事累官福州將軍乾隆元年改官巡
道以疾辭 高宗怒籍其家無長物得簿公私出入如
列眉 上以爲廉授長蘆鹽政調兩淮九年巡撫安徽
歷廣東山西山東巡撫辛未南巡或勸拘虎豹備彈弦
跕屣爲供奉者公大驚曰 皇上爲觀河省稼巡狩望
書如日爲大臣者目未慣其可違詔以非道悅耶除方

物外無所貢十七年以合河僞疏事致於理發香山監
工病卒年七十二少子某舉孝廉後爲僧號瑩壠上人
朱二亭嘗贈以詩云夢回鐘靜萬緣離欲作人天大導
師開府中丞貴公子打包南國苦闇黎松風吹雨收經
處山月流泉得偈時我亦擬求精進法憑君慧劍斷嗔
癡

雍正丁未武進莊南村兵備桂廷對進呈第一後易置
二甲第二張文和嘗語人曰莊某宜元而不元稍抑於
前必償於後至乾隆乙丑方耕宗伯從二甲擢一甲第
二甲戌仲澤講學以二甲第一特置一甲第一丙子方

耕典試浙江仲潭主福建試皆道出常州試竣共給假
奉觴二親錢文端贈句云殿上卿雲傳兩見膝前天使
喜同歸一時稱爲盛事仲潭婦翁爲彭芝庭尙書丁未
會狀亦佳話也其上德濟齋少宰云夙德冠崇班巖巖
峻斗山忠勤唐特進禮樂漢河閒景緯同標望蒼生願
識顏虛懷仍善下詣絕莫躋攀列士榮非願名山道與
俱精心窮橐籥元理洩苞符黼座煩紝眷蓬廬尙久須
從來稱大雅今曰覩眞儒衡岳凌無極東溟一氣中幾
年膺玉節到處扇春風每念江淮地彌靄覆露功袞衣
南國頌豈弟孰如公帝命佐邦衡南曹領搢紳均平隨

器量清覽絕風塵槐市陳經篋蓬山引席珍春風盈講
座誰不荷陶甄觀海朝宗切登門夙志欽願陪鱣座側
卻望桂巖深朗若雲霞氣清知松柏心陳詞歌壽豈珍
重愧南金

翁正三乙巳三月廿九日奏事清漪園詩別館新晴曙
剛逢奏雨來廊深湖水繞逕轉龔山開日泛金霞影天
浮碧玉堆小金侍臣賜食罷冊載記蓬萊清漪園在萬
壽山先臣侍郎公嘗奉派管理園務高宗以萬壽山
背山臨水因名其堂曰樂壽堂米萬鍾欲致房山大石
於勺圍僅達良鄉而止乾隆辛未命移置樂壽堂名之

曰青芝岫而係以詩近西軒夕佳樓皆向西山金陵觀
音山永濟寺懸閣臨江飛廊緣壁因於萬壽山仿作香
巖室取滕王閣序句意作六兼齋每至清漪園先坐玉
瀾堂傳餐理事肖西湖蕉石鳴琴景爲睇佳榭蘇門山
有邵雍安樂窩遺蹟肖其制爲邵窩餘如停靄樓無盡
意軒袖嵐書屋宜雲館舍新亭對鷗舫澄鮮堂圓朗襟
澹寧堂清可軒清遙亭味閒齋知春亭構虛軒霽清軒
養雲軒雲繪軒蘊香榭繪芳堂尋雲亭雲松巢道名齋
曠觀齋景明樓水周堂治鏡閣寄瀾亭懷新書屋各有
題詠其怡春堂則每鎧節後奉慈寧憑御處也惠山秦

園最古辛未南巡歸肖其意於萬壽山東麓名曰惠山

園有載時堂墨妙軒

內府三希堂帖於壬申年鑄成甲戌又刻墨妙軒帖於此就雲

樓澹碧齋水樂亭知魚橋尋詩逕涵光洞八景若暢春

園則在圓明園之南 聖祖所建正殿名九經三事

翁正三兩直西苑同韻亭賦豐澤深千耦瀛壺繞十洲

玉虹隄外雨珠露鏡中秋又玉蘭軒奏事詩極巒合秋

陰仙壺貯碧岑地迴瑤海北天在玉蘭心皆嘉慶初年

作也西苑在西華門之西創自前明今瀛臺上之涵元

殿諸處皆仍其舊至迤北之豐澤園惇敘殿乃康熙閒

所建迤南之漱清院寶月樓同豫軒一帶則乾隆閒所

增白塔山卽金時之瓊華島順治間以建白塔而名其
下爲太液池又稱爲瀛臺三海引西山玉泉水從德勝
門水關達地安門之後湖從步梁橋潛流入苑匯爲巨
池中海東西岸跨長橋修數百步樹坊楔二東曰玉蝦
西曰金鼈橋以南爲中海南海橋以北爲北海中海北
面北海南面繚垣皆屬於橋俗所謂西湖者開濬深廣
名之曰昆明湖設閘啟閉以溉稻畦以耕織圖摹成石
刻置於延賞齋是處前後爲織染局西爲蠶戶房環植
以桑西隔玉河皆爲稻田康熙閒幸西苑泛舟詞臣侍
宴分賜魚藕乾隆閒有流杯亭聯句中如漪蘭堂同豫

軒蘭室諸處爲歲時佛宇升香簡閱水技臨駐之所其
寺院則萬善時應標於南永安闡福大西天極樂世界
諸寺標於北春耦齋在瀛臺之西一路皆田塍惇敘殿
在豐澤園門內殿後爲澄懷堂乾隆閒駕詣瀛臺召對
茲事每在於此承光殿面臨太液池東有堂曰古籟最
高處爲悅心殿乾隆己亥得馮銓快雪堂石刻補摹泐
石築快雪堂砌石其中浴蘭軒在液池上俗謂之北海
浴蘭義取九歌復初齋集作玉蘭軒誤豐樂軒在紫碧
山房東南隅爲世宗所構閱古樓在瓊島西麓嵌三
希堂法帖石刻於壁閒紫光閣本明之平臺乾隆二十

五年平定伊犁回部圖功臣像其中並奔藏得勝靈纛
軍器自是每歲朝正移藩部謙集於此閣之後爲武成
殿左右壁刻御筆西師詩開惑論左右廡刻乙亥記己
卯成功詩二百二十餘首 高宗聖製春耦齋記曰語
云周過其麻秦不及期班固美其親親賢固本眾建
至鄙秦以子弟爲匹夫骨肉失藩衛其然豈其然哉夫
秦之失賈誼論之詳矣闢封建之議則莫過於柳宗元
而周之所以過其麻後世鮮有發厥旨者蓋自后稷公
劉世以重農爲務惟土物愛知稼穡艱至於文武成康
猶是道也立我蒸民祈天永命詩書所歎略同一軌國

家龍興東海較之周家藝莊菽迺場疆者固有不同而
天下初定禮樂未遑卽舉祈穀之祭下力田之詔我
皇祖建此豐澤園於西苑以劭樹藝而較晴雨至於
皇考歲舉耕耘之典必先演耕於園北弄田以視周家
世業肯獲者有過無弗及予小子聰聽祖考之彝訓亦
惟是無逸作所民本食天之念拳拳母懈不敢以一己
之貴而忽萬姓之窮不敢以四方之豐而忘一隅之歉
二十一年以來此物此志也園之內有齋茲以春耦名
之而闡其說如有石渠寶笈中舊藏唐韓滉五牛圖農
部尚書蔣溥因進其父故大學士蔣廷錫倣項聖謨摹

本又得項聖謨卷古今名蹟一曰會合良稱藝苑盛事
夫服疇力稽牛之資用最鉅並貯齋中每一展觀如見
洪縻縹輒馴擾膏壤閒然予知依務本之意所爲在此
不在彼也至勤政殿居西苑正中額爲 聖祖奎畫
世宗於圓明園視事之殿亦以勤政名之 高宗於香
山靜宜園復建勤政殿 列聖相承莫不以是爲亟
仁宗曾著勤政殿記勤政箴揭示焉補桐書屋綺思樓
皆雍正初年 高宗讀書處曰日知閣在石梁上日課
詩論於此樂善堂集而外別爲日知齋說四卷見乾隆

戊申日知閣詩注

黃莘山恭頌惠獻貝子功績詩并呈制府鎮國將軍云
秉鉞登壇世統兵折衝樽俎舊威聲鎬鐘豐鼎藏金冊
旃矢彤弓出玉京鐃吹連山摧伏莽樓船橫海戮長鯨
宗臣名將垂勳少半壁東南萬里城三葉方苞起韜毛
中原慘黷沸波濤專征元帥歸龍種制闢將軍握豹韜
下瀨眞成迎刃勢丸泥空訥守關勞降王已入游魚鼎
笑語迎門餉濁醪鞠躬盡瘁鬢如絲蹇蹇王臣逐尾箕
新息漳生茆嶺日臥龍星隕丈原時勤民定國馨香重
丹荔黃蕉陟降思不獨闕宮瞻奕奕道山亭比峴山碑
天潢貽燕溯淵源嶺海重瞻榮載門周召勳庸縣帶礪

閒平禮樂奠屏藩治臻累洽重熙日人受三朝再世恩
歲歲祠堂春草綠杖藜騎竹擁王孫時乾隆初元德濟
齋方督閩浙也

吳縣韓其武明經補瓢存稿爲歸愚宗伯手訂詩詞古
文皆蘊藉醕雅爲有德之言經項宮詹廢園云林巒莽
榛蕪陂池沒新漲巍巍宮詹園行人過惆悵勝國隆儒
臣金貝從物望冠以東朝銜居然號儲相布置依前模
粉藻愜心匠難窮歌舞娛罔測花鳥狀不幸罹世厄失
足誤所向國破家何依身名兩凋喪想當誦讀時亦能
籌伯王事至不復持空言安足仗公卿羅第宅誰能久

無恙功名與氣節卓爲世景仰賢愚同百年不朽亦相
況流連景物餘藉爾作懲創欲保明哲身反遜匹夫諒
許琰故寒儒詎識游觀壯其曾祖治明黃巖令祖馨明
諸生崇禎初定逆案吳人毀逆祠卽其地爲五人墓馨
時年未弱冠以書名吳因之致書乞題碣大書五人之
墓四字書曰人予之也所以媿屈膝闡寺之不爲人者
其武詩云英風颺颺繞迴塘青塚纍纍俠骨香一擊自
同椎博浪百身何異痛三袁頭顱敢爲忠臣惜販負能
增黨籍光變例春秋墓前石先人特筆凜風霜王西莊
日下集懷其武詩滌骨鏗肌格儘奇都官水部轉多師

比來蹤跡成蕭散嬾作虛憚桃杖詩蓋甚推之其題趙承旨畫云雕鞍初脫臥平沙想爲天閒貌玉花太息朔風吹白雁舊時龍種屬誰家花花葉葉意交融露側風敲自化工誰道遺民作心史也將餘墨寫幽叢語亦含蓄

補瓢明經先世居長洲之雲和里號雲東韓氏內行醕備從父弟子敬疾篤執補瓢手指其婦腹曰儻生男必教以讀書母歿我業死踰月果生男暢生四歲母又歿攜暢來家以養以教十有三年作文頗有進口占示之曰母胎悲失父四歲母云亡兩匱棲彊屋孤雛寄我傍